



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Suai

20 Marsu 2015

**Tribunál Distritál Suai absolve arguidu ba kazu violasaun seksuál ho natureza inestu:
JSMP kontinua husu artigu espesifiku ba krime inestu**

Iha 12 Marsu 2015, Tribunál Distritál Suai absolve arguidu AL ne'ebé antes ne'e ministériu públiku akuza komete krime violasaun seksuál hasoru nia oan fetu rasik ho tinan 18. Kazu ne'e akontese iha 06 Dezembru 2014.

Tribunál absolve arguidu tanba tribunál konsidera arguidu ninia hahalok la prienxe rekizitus violasaun seksuál ne'ebé previstu iha artigu 172 Kódigu Penál kona-ba violasaun no artigu 173 kona-ba agravasaun. Tribunál konsidera katak arguidu no lezada halo relasaun tanba hakarak no hakarak, laiha ameasa no laiha obligasaun.

Tinan barak ona desde 2012 to'og agora JSMP rekomenda atu kriminaliza inestu sein hare ba vítima nia konsentimentu. Inestu nu'udar forma krime violénsia seksuál ne'ebé perigozu tebes iha sosiedade no involve esplorasau posizaun autóridade família.

“JSMP preokupa tebes wainhira tribunál absolve arguidu hosi krime inestu tanba deit vítima la reziste hasoru arguidu. Dezisaun ne'e sei iha potensia fo espasu krime inestu seluk akontese iha comunidade iha futuro, tanba sira fiar katak inestu la'os krime no ida ne'e risku tebes ba labarik fetu sira iha área hotu-hotu,” dehan Diretór JSMP Luis de Oliveira Sampaio.

Ministériu Públiku akuza arguidu katak iha 06 Dezembru 2013, wainhira lezada toba hela arguidu tama ba iha lezada nia kuartu laran no kaer lezada nia ulun no halo lezada hakfodak no hader tiha. Iha momentu ne'ebá lezada husu ba arguidu dehan katak “pai atu foti saida?”. Maibe arguidu hatan katak “laiha buat ida toba deit ba”. Depois arguidu mós sai fali hosi lezada nia kuartu laran. Wainhira lezada toba dukur tiha, arguidu tama fila fali ba lezada nia kuartu laran no halo violasaun seksuál ho lezada.

Tuir-mai iha 07 Dezembru 2013, iha tuku 04:00 madrugada, arguidu haruka nia feen (lezada nia inan) ba kuru tiha bee no arguidu aproveita tempu hodi tama ba lezada nia kuartu laran no halo tan violasaun seksuál ho lezada. Depois remata, arguidu ameasa lezada katak “la bele dehan ba ó nia inan se lae ó mak mate ou hau mak mate”.

Ministériu Públiku akuza arguidu kontra artigu 172 Kódigu Penál kona-ba violasaun 173 Kódigu Penál kona-ba agravasaun.

Iha prosesu julgamentu arguidu nega faktu sira iha akuzasaun katak nia la ameasa lezada hodi halo relasaun seksuál maibé tanba hakarak ho hakarak.

Iha parte seluk, lezada mós deklara katak arguidu la ameasa nia wainhira halo relasaun seksuál. Lezada rekoñese katak nia la-halo asaun hasoru arguidu wainhira arguidu halo violasaun seksuál hasoru nia. Lezada deklara katak sira halo relasaun seksuál dala 2.

Iha tinan 2014 nia klaran, Parlamentu Nasionál husu JSMP no ALFeLa ninian komentáriu kona-ba proposta hodi amenda artigu 172 (violasaun) hosi Kódigu Penál atu inklui sub-sesaun kona-ba krime inestu.

JSMP no ALFeLa louva Parlamentu hodi asegura katak krime inestu ne’ebé propoin aplika sein haree ba vítima ninian konsentimentu, idade no se uza duni forsa ka ameasa ka lae, nomós asegura katak inestu ne’e krime públiku no bele aplika ba membru familia oioin, inklui relasaun hakiak nian no relasaun tiun-subriña.

JSMP no ALFeLa pública ona submisaun “Hadiak Kódigu Penál atu proteze diak liu fetu no labarik” ne’ebé rekomenda atu haketak krime inestu hosi krime violasaun seksuál tanba ninian karateristika la hanesan no envolve provas diferente, nomós rekomenda krime inestu bele aplika ba aktu seksuál seluk la’os deit violasaun.

Ita hotu hatene katak wainhira vítima ida hetan violasaun seksuál hosi ema ne’ebé iha pozisaun iha família, susar tebes ba vítima atu hateten sai tanba tauk lakon nia direitu iha uma laran, tauk hetan presaan no moe ho comunidade komun. Nune’e vítima sempre taka no la hateten sai ba ema seluk tantu nia inan rasik. Tuir JSMP se kondisaun no situasaun hanesan ne’e akontese bebeik sei fo impaktu psikolojia boot ba vítima no nafatin hakiak krime no halo buras krime inestu iha comunidade.

Iha 16 Marsu 2015, foin lalais ne’e, wainhira Ministériu Públiku apresenta relatóriu anual 2014 ba iha Parlamentu Nasionaal mós husu ba Parlamentu Nasionál atu kriminaliza inestu sein haree ba vítima nia konsentimentu.

JSMP espera katak Parlamentu Nasionál bele konsidera rekomendasaun hirak ne'ebé hakerek iha submisaun no konsidera mós saida mak Prokurador Jerál da Repúblika husu iha momentu aprezena relatóriu annual refere tanba krime inestu hanesan krime komun.

Rekomendasaun sira no submisaun kompletu refere bele asesu iha website <http://jsmp.tl/publikasaun-publications/submisaun-sira/>.

Audiénsia julgamentu ne'e prezide hosi Dr. Argentino Luisa Nunes representante juis kolektivu. Ministériu Públiku representa hosi Dr. Jose Elo no arguidu hetan akompañamentu hosi Dr. Manuel Amaral husi Defensória Públiku.

Atu hetan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone:3323883 | 77295795